



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj: 96/13 i 89/16) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2019. GODINU POLITIČKE ORGANIZACIJE NAROD I PRAVDA

Broj: 03-07-6-274/20
Sarajevo, 01.10.2021. godine

SADRŽAJ

MIŠLJENJE	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet revizije	5
Cilj revizije	5
Obim revizije	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1 NALAZI.....	5
5.2 PREPORUKE	8

MIŠLJENJE

Služba za reviziju finansiranja političkih stranaka izvršila je reviziju finansijskog izvještaja Političke organizacije Narod i pravda za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskog izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom godišnjeg finansijskog izvještaja za 2019. godinu, utvrđeno je da je Politička organizacija Narod i pravda prekršila odredbe člana 4. stav (1), člana 11. stav (1) i člana 12. stav (1) i (4) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Politička organizacija Narod i pravda u 2019. godini postupala u skladu sa odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja Političke organizacije Narod i pravda za 2019. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Politička organizacija Narod i pravda finansirala se iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	4.432,00	1,56
2.	Prilozi fizičkih lica (3-a)	1.050,00	0,37
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	278.119,89	97,85
8.	Prihodi od propagande (3-g)	0,00	0,00
I	Ukupni prihodi (1-8)	283.601,89	99,78
II	Ostali prihodi i drugo	635,00	0,22
	Izvori finansiranja (I+II)	284.236,89	100,00

U godišnjem finansijskom izvještaju politička stranka je iskazala rashode u ukupnom iznosu od 246.129,33 KM.

2. PREDSTAVLJANJE POLITIČKE STRANKE

Naziv političke stranke je Politička organizacija Narod i pravda.

Politička organizacija Narod i pravda upisana je u registar kod Općinskog suda u Sarajevu, Rješenjem broj: 065-0-FI-18-000004 od 02.04.2018. godine, sa sjedištem u ulici Skenderija broj 5. Rješenjem Općinskog suda u Sarajevu broj: 065-0-F1-19-000003 od 08.07.2019. godine, upisana je promjena sjedišta stranke.

Sjedište stranke je u Sarajevu, ul. Hakije Kulenovića broj 12.

Lice ovlašteno za predstavljanje i zastupanje stranke je Elmedin Konaković, predsjednik stranke. Lice ovlašteno za podnošenje finansijskih izvještaja za 2019. godinu je Mirza Selimbegović.

Prema podacima iz godišnjeg finansijskog izvještaja za 2019. godinu¹ Politička organizacija Narod i pravda ima sljedeću organizacionu strukturu:

¹ U finansijskom izvještaju, koji je Centralnoj izbornoj komisiji BiH podnijela podnijela 01.04.2020. godine, politička stranka je u okviru organizacione strukture u 2019. godini prijavila samo Centralni ured stranke u Sarajevu, a potom u septembru izvršila korekcije izvještaja te pored Centralnog ureda prijavila organizacione dijelove stranke u pet općina i tri grada u Federaciji BiH.

- Centralni ured stranke u Sarajevu,
- Organizacioni dijelovi stranke u pet općina (Novi Grad Sarajevo, Vogošća, lidža, Ilijaš i Hadžići),
- Organizacioni dijelovi stranke u tri grada (Goražde, Zenica i Mostar).

3. OPIS PREGLEDA I KONTROLE FINANSIJSKOG IZVJEŠTAJA

Predmet revizije je godišnji finansijski izvještaj Političke organizacije Narod i pravda za 2019. godinu i to svih njenih organizacionih dijelova.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Politička organizacija Narod i pravda u izvještajnom periodu postupala u skladu sa odredbama Zakona o finansiranju političkih stranaka.

Obim revizije finansijskog izvještaja Političke organizacije Narod i pravda obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je izvršila pregled finansijskih izvještaja Političke organizacije Narod i pravda za 2018. godine, nakon koga je izdat izvještaj o pregledu sa mišljenjem revizora, nalazima revizije i preporukama stranci: da finansijska sredstva obezbijeđena za finansiranje stranke koristi u skladu sa utvrđenim programom utroška sredstava i statutom, da poslovne knjige vodi u skladu sa računovodstvenim propisima, odnosno da uspostavi tačne evidencije o rahodima i obavezama stranke i da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Politička organizacija Narod i pravda nije ispoštovala date preporuke.

5. NALAZI I PREPORUKE

5.1 NALAZI

a) Revizijom godišnjeg finansijskog izvještaja utvrđeno je da je Politička organizacija Narod i pravda prekršila odredbe člana 4. stav (1) Zakona o finansiranju političkih stranaka.

U skladu sa odredbama iz člana 4. stav (1) Zakona o finansiranju političkih stranaka, stranka je obavezna sačiniti program utroška sredstava za svaku kalendarsku godinu, te u skladu sa istim sredstva koristiti isključivo za ostvarivanje ciljeva utvrđenih svojim programom i statutom.

Programom utroška sredstava za 2019. godinu² koji je Politička organizacija Narod i pravda dostavila uz dodatnu finansijsku dokumentaciju za 2019. godinu³, predvidjela je ukupne rashode u iznosu od 250.000,00 KM. U poslovnim knjigama i finansijskom izvještaju, koji je

² Na dokumentu je navedeno: Revidirani plan - Program utroška sredstava, koji je donesen u januaru 2019. godine.

³ Aktom Centralne izborne komisije BiH, broj: 03-07-6-129/19 od 12.02.2019. godine, kojim je politička stranka obaviještena o obavezi podnošenja godišnjeg finansijskog izvještaja za 2018. godinu do 31.03.2019. godine, od političke stranke je zatraženo da u istom roku dostavi i program utroška sredstava za 2019. godinu.

podnijela Centralnoj izbornoj komisiji BiH politička stranka je iskazala ukupne troškove u iznosu od 246.129,33 KM.

Revizijom finansijskog izvještaja i finansijske dokumentacije, utvrđeno je da je Politička organizacija Narod i pravda sredstva u iznosu 28.090,53 KM utrošila mimo svog programa utroška sredstava za 2019. godinu, kako slijedi:

- Stranka je planirala troškove zakupa putničkih vozila u iznosu od 15.000,00 KM, a u poslovnim knjigama i finansijskom izvještaju je prijavila troškove zakupnine ostvarene u 2018. godini u iznosu od 8.880,00 KM i troškove zakupnine za 2019. godinu u iznosu od 13.320,00 KM, što je za 7.200,00 KM više od planiranog iznosa.
- Troškove materijala (kancelarijska oprema, namještaj i sitni inventar, te potrošni materijal) stranka je planirala u iznosu od 8.000,00 KM, a ostvarila ih je u iznosu od 9.340,91 KM, što je za 1.340,91 KM više od planiranog iznosa.
- Troškove goriva, parkinga i putarine stranka je planirala u iznosu od 2.000,00 KM, a ostvarila je troškove goriva u iznosu od 2.475,32 KM.
- Politička stranka je ostvarila troškove u iznosu od 15.575,67 KM, koje nije predvidjela svojim programom utroška, a to su: troškovi ostalih zakupnina u iznosu od 5.528,00 KM, troškovi mobilnog telefona u iznosu od 1.880,88 KM, troškovi fiksnog telefona u iznosu od 2.468,62 KM, troškovi poštarine i internet usluga u iznosu od 296,42 KM, troškovi obezbjeđenja u iznosu od 3.201,75 KM i troškovi stipendija u iznosu od 2.200,00 KM.
- Stranka je izvršila ulaganja u tuđa sredstva u iznosu od 35.498,63 KM, koja je svojim programom utroška sredstava predvidjela kao ostale troškove u iznosu od 32.000,00 KM.

Na osnovu prethodno navedenog utvrđeno je da je Politička organizacija Narod i pravda prekršila odredbe člana 4. stav (1) Zakona o finansiranju političkih stranaka.

b) Stranka je prekršila odredbe člana 11. stav (1) i člana 12. stav (1) i (4) Zakona o finansiranju političkih stranaka.

Revizijom finansijskog izvještaja i dodatne dokumentacije utvrđeno je da Politička organizacija Narod i pravda nije uspostavila blagovremene evidencije o svojim rashodima, te finansijski izvještaj nije popunila na način kako je Centralna izborna komisija BiH propisala Pravilnikom o godišnjim finansijskim izvještajima političkih stranaka - u daljem tekstu: Pravilnik, čime je prekršila odredbe člana 11. stav (1) i člana 12. stav (1) i (4) Zakona o finansiranju političkih stranaka.

- (1) Politička stranka je u finansijskom izvještaju iskazala ostali prihod u iznosu od 635,00 KM. Uvidom u finansijsku dokumentaciju, utvrđeno je da je priloge fizičkih lica, niže od 100,00 KM, koje je ostvarila u ukupnom iznosu od 285,00 KM, politička stranka suprotno odredbama člana 13. i 14. Pravilnika, u finansijskom izvještaju iskazala kao ostali prihod. Za iznos od 350,00 KM, koji je politička stranka iskazala kao ostali prihod, ostvaren otpisom obaveze 30.09.2019. godine prema JU Centar za kulturu Goražde, uvidom u revizijske dokaze koje su na zahtjev Centralne izborne komisije BiH dostavili Grad Goražde i navedena javna ustanova, utvrđeno je da je politička stranka svoju obavezu izmirila 10.12.2019. godine, te nije ostvarila prihod koji je prijavljen u finansijskom izvještaju.
 - (2) Revizijom je utvrđeno da je Politička organizacija Narod i pravda dio troškova, suprotno računovodstvenim propisima i odredbama člana 11. i člana 12. stav (1) i (4) Zakona o finansiranju političkih stranaka, evidentirala u momentu njihovog plaćanja, a ne u vrijeme kada je stranci pružena usluga.
- Polička stranka je u poslovnim knjigama i finansijskom izvještaju kao trošak iz 2019. godine iskazala zakupninu putničkih vozila u iznosu od 22.200,00 KM.

Uvidom u finansijsku dokumentaciju utvrđeno je da je Politička organizacija Narod i pravda po osnovu ugovora o zakupu koje je 2018. godine zaključila sa dva fizička lica ostvarila troškove zakupnine u iznosu od 8.880,00 KM, dok je troškove zakupnine za 2019. godinu ostvarila u iznosu od 13.320,00 KM.

Pored zakupnina za 2018. godinu, koje su evidentirane u momentu isplate, kao trošak 2019. godine, i zakupnine za 2019. godinu su evidentirane u momentu isplata u periodu od marta do avgusta 2019. godine, bez obzira na činjenicu da je ugovorima o zakupu obuhvaćen period od 01.01.2019. do 31.12.2019. godine.⁴

- Zakupnine poslovnog prostora koje su isplaćene zakupodavcu Muneveri Trnka u mjesečnim iznosima po 500,00 KM za period od septembra do decembra 2018. godine u poslovnim knjigama i finansijskom izvještaju su evidentirane kao troškovi iz 2019. godine.
 - Mjesečne zakupnine u iznosu od 120,00 KM koje su isplaćene Aidi Alić, počev od maja 2018. godine, u poslovnim knjigama su evidentirane kao zakupnine iz 2019. godine.
 - Kao troškove 2019. godine politička stranka je u poslovnim knjigama evidentirala isplate zakupnine za decembar 2018. godine za svoje organizacione dijelove u Goraždu, Ilijašu, Zenici i Novom Gradu Sarajevo, u ukupnom iznosu od 1.510,00 KM.
 - Stranka nije evidentirala trošak zakupnine, niti obavezu po osnovu ugovora o zakupu poslovnog prostora, koji je 27.10.2019. godine zaključila sa fizičkim licem Avdagom Mujkićem iz Zavidovića, uz mjesečnu cijenu zakupa od 200,00 KM.
 - Politička stranka je trošak knjigovodstvenih usluga evidentirala u iznosu od 351,00 KM, za period od tri mjeseca i to samo po računima koji su plaćeni 2019. godine. Uvidom u finansijsku dokumentaciju i ugovor o pružanju knjigovodstvenih usluga, utvrđeno je da su stranci knjigovodstvene usluge tokom 2019. godine pružala dva pravna lica: od januara do oktobra pravno lice ES-3A d.o.o. Sarajevo, a od novembra do decembra OD „Global konto“ vlasnik Senad Cvrk Sarajevo, pa je stranka ostvarila troškove u iznosu od 1.404,00 KM. Osim što nije iskazala troškove u iznosu od 1.053,00 KM, stranka nije evidentirala ni obaveze prema licima koja su joj pružila knjigovodstvene usluge.
 - Radi neblagovremenih evidencija politička stranka je u poslovnim knjigama za 2019. godinu evidentirala troškove iz ranijih godina u iznosu od 2.909,31 KM, te ih je u finansijskom izvještaju prijavila kao ostale rashode, iako su se isti odnosili na: troškove reprezentacije, nabavku goriva, telefonske usluge i nabavku kancelarijskog materijala.
- (3) U finansijskom izvještaju, koji je podnijela Centralnoj izbornoj komisiji BiH, politička stranka je samo troškove zakupnine iskazala po organizacionim dijelovima stranke, dok je sve druge troškove iskazala kao troškove Centralnog ureda stranke u Sarajevu. Obzirom da sve troškove nije iskazala po organizacionim dijelovima, politička stranka je prekršila odredbe člana 22. Pravilnika.
- (4) Politička stranka nije pravilno izvršila klasifikaciju troškova, te ih u finansijskom izvještaju nije prijavila u skladu sa odredbama Pravilnika.
- Date donacije za medicinsko i banjsko liječenje u iznosu od 2.380,00 KM stranka je u izvještaju prijavila kao ostale rashode.
 - Zakup vozila u iznosu od 22.300,00 KM stranka je u finansijskom izvještaju prijavila skupa sa troškovima zakupnine poslovnih prostora i troškovima ostalih zakupnina.
- (5) Politička stranka je u poslovnim knjigama iskazala troškove građevinskih radova u iznosu od 35.498,63 KM, a u finansijskom izvještaju, koji je podnijela Centralnoj izbornoj komisiji BiH prijavila ih je kao ulaganja u tuđa sredstva u istom iznosu i to kao trošak 2019. godine. Ovakav

⁴ Ugovorima je utvrđeno da se svakom od zakupodavaca mjesečne zakupnine u iznosima od 555,00 KM isplaćuju najkasnije do datuma 15-og u mjesecu za protekli mjesec.

način evidentiranja navedenog poslovnog događaja nije svojstven računovodstvenim propisima.

- (6) Suprotno odredbama člana 24. Pravilnika, politička stranka u finansijskom izvještaju nije prijavila obaveze po osnovu poreza i doprinosa na plate i ugovore o djelu, koje je u poslovnim knjigama na dan 31.12.2019. godine iskazala u iznosu od 2.249,89 KM.
- (7) Revizijom je utvrđeno da potvrde, koje je stranka izdala fizičkim licima od kojih je primila članarine u iznosu od 4.432,00 KM i priloge u iznosu od 1.050,00 KM ne sadrže dio podataka propisan članom 6. Pravilnika, odnosno ne sadrže podatke o broju ličnog dokumenta, adresi i mjestu njihovog prebivališta⁵.
- (8) Utvrđeni su nedostaci kod računa dobavljača, koji su knjigovodstvene isprave o nastalim poslovnim događajima, kao i kod izvoda otvorenih stavki sa dobavljačima.
U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.
- Na računu pravnog lica INTEA BH d.o.o. Sarajevo broj: 1428-05/2019 od 22.05.2019. godine na iznos od 5.000,00 KM (vrijednost sa obracunatim PDV 5.850,00 KM) nije navedena vrsta, niti količina promotivnog materijala na kome je izvršena štampa⁶.
 - Uvidom u račune pravnih lica: „Swissotel“ d.o.o. Sarajevo, broj: 722 od 13.02.2019. godine na iznos od 998,00 KM i račun broj: 756 od 15.02.2019. godine na iznos od 631,00 KM, te račun pravnog lica Leftor d.o.o. Tuzla, broj: 2808/19 od 24.05.2019. godine na iznos od 234,00 KM utvrđeno je da isti nisu potpisani od strane ovlaštene osobe, niti su ovjereni pečatom ovih pravnih lica.
 - Na zahtjev Centralne izborne komisije BiH stranci da dostavi izvod otvorenih stavki (IOS) na dan 31.12. 2019. godine sa dobavljačem FACE d.o.o. Sarajevo, kojim je trebalo biti usaglašeno stanje obaveza političke stranke prema ovom dobavljaču, politička stranka je dostavila dokument, na osnovu koga se ne može pouzdano utvrditi stanje obaveze. IOS sa FACE d.o.o. Sarajevo u kome je evidentirano potraživanje od stranke u iznosu od 2.340,00 KM, nastalo prije izvještajne godine, nije potpisan niti od jedne strane.
- (9) Suprotno računovodstvenim propisima, politička stranka nije postupala u skladu sa propisima i principima blagajničkog poslovanja. Uvidom u naloge od blagajne, na kojima su evidentirane isplate troškova iz prethodne godine, u iznosu od 2.675,30 KM utvrđeno je da isti nisu potpisani od strane ovlaštenih osoba, niti su i ovjereni pečatom političke stranke.

5.2 PREPORUKE

Preporučuje se Političkoj organizaciji Narod i pravda da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***da finansijska sredstva obezbijedena za finansiranje stranke koristi u skladu sa utvrđenim programom utroška sredstava,***

⁵ Stranka je nakon izvršene revizije, odnosno 28.06.2021. godine dostavila korigovane potvrde, u koje je unijela podatke o broju ličnog dokumenta, adresi i mjestu prebivališta fizičkih lica koja su uplatila priloge i članarinu. Nalaz revizije je ostao nepromijenjen, jer se potvrda izdaje u momentu prijema članarine i prijema donacije.

⁶ Na računu je navedeno „štampa promotivnog materijala“ u količini jedan (1) po cijeni 5.000,00 KM (vrijednost sa obracunatim PDV 5.850,00 KM).

- *da poslovne knjige vodi u skladu sa računovodstvenim propisima, odnosno da uspostavi blagovremene i tačne evidencije o prihodima i rashodima stranke,*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka,*
- *da obrati pažnju na ispravnost i knjigovodstvenih isprava i*
- *da blagajnu vodi u skladu sa važećim propisima i principima blagajničkog poslovanja.*

KOMENTAR

Politička organizacija Narod i pravda se u datom roku očitovala na Preliminarni izvještaj o reviziji godišnjeg finansijskog izvještaja za 2019. godinu. Uz očitovanje politička stranka je dostavila kopije izjava, potpisanih od strane svih zakupodavaca poslovnih prostora, u kojima je navedeno da je postignut usmeni dogovor o investicionim radovima, odnosno da politička stranka kao zakupoprimac ima pravo da renovira, adaptira i prilagodi prostor svojim potrebama, s tim da prilikom primopredaje prostora zakupodavcu stranka o svom trošku prostor vrati u prvobitno stanje. Politička stranka je dostavila foto dokumentaciju o aktivnosima koje su provedene putem ugovora o djelu, te navela web stranicu na kojoj je objavljeno niz organizovanih i održanih manifestacija i edukativnih tribina. Stranka navodi da je kao promotivni materijal izradila razne brošure, info letke, plakate i drugi promotivni materijal kojim se promovišu dostignuće i planovi Političke organizacije Narod i pravda, te njena aktuelna politika u svjetlu trenutnog političkog stanja u Kantonu Sarajevo i Bosni i Hercegovini.

Takođe, politička stranka je dostavila akt pravnog lica Global konto d.o.o. Sarajevo, koje vodi poslovne knjige stranke, kojim ova agencija potvrđuje knjigovodstvene propuste u 2019. godini i navodi da su neke od grešaka ispravljene 2020. i 2021. godine.

Na osnovu novih revizijskih dokaza, koje je dostavila politička stranka, te dokaza pribavljenih iz eksternih izvora, nakon očitovanja političke stranke, Služba za reviziju je korigovala nalaze navedene u preliminarnom izvještaju revizije.

Zahvaljujemo se osoblju političke stranke na korektnoj saradnji tokom obavljanja revizije finansijskih izvještaja.

Pomoćnik revizora

Mr.sc. Goran Cicović

Šef Službe za reviziju, revizor

Mr.sc. Hasida Gušić